

Bericht Landskron vom 18. September 2016

D Landskron über mym Huus
mängmool chum i gar nüm druus
i ha jo au scho gmeint und glacht
do obe het öper s`Licht aagmacht
nei, nei es isch numme d`Belüchtig vo dr Burg
gar nüt Schlimms und kei Betrug.
E Tüschig und kei Mensch wohnt do
das isch scho lang , lang so.
Aber am Bättag isch es so Bruuch
3 Pfarrer im Gottesdiensch und öppis für e Buuch

Dismool singt unsere Chor au mit
im Gottesdiensch mit Muusiker, das isch e Hit.
Es isch so Turnus alli 4 Joor
die andere 3 Mool singt e andere Chor.

Erstuunt und froh simmer aacho
e Zält stohd dismool sogar doo.
Es rägnet und rägnet, das isch kei Gspass
mit Zält wird alles nümme nass.

E paar Muetigi sin sogar z`Fuess cho
und hänn sich d`Luune nid verderbe loo.
Das Zält ufstelle isch e tüüri Sach
es bruucht viel Lüt und au kei Krach.
Dr Michael het sich au scho informiert
in däm Bankgschäft isch är versiert.
In dr Predigt hämmer das spöter vernoo
und viel hilfrichi Informatione bechoo.

Zum Ablauf vo däre Fyyr isch z`saage
mit em Chorlied **IN DIR IST FREUDE** wämer`s waage
E fröhliche Uftakt isch uns glunge
mit musikalischer Unterstützig hämmer gsunge.

D Begriessig vom Leymener Pfarrer uf elsässisch isch guet
es bruucht au no e Bitzeli Muet
denn Französisch isch aagseit
s Elsässisch uf d`Zyte gleit .
Dorum s nöchsch Chorlied : **JE LOUERAI L`ETERNEL** und e Gebätt.
D`Bibelläsig Amos um Gäld und fälsche isch nid nätt.
S Gmeindlied **Jesus le Christ / Dunkelheit ist**

S Evangelium vom Pfarrer Hulin zelebriert
D Lüt loose zue und sin intressiert.
Dismool wird sogar vom eidg. Bättag öppis gseit
und zwar vom französische Pfarrer vortreit
er het das im Internet recherchiert
und **uns** und au d Franzose informiert

Syt 1690 isch dä DANK ,BUESS UND BAETTAG e Fyyrtig in dr Schwyz
nümme so sträng wie friener , numme no e Bitz.

D Predigt goht wie scho gseit ums Gäld
für viele s`Wichtigst uf dr Wält.
Um Schulde, um fälsche um liege und so
und trotz däm het dä Verwalter Lob übercho.

D Bläsergruppe mit däm schöne Stück ALAMANDE
Trotz Rägegrüsch hets wunderschön klunge
und mir hänn mit dr Gmeind nach de Fürbitte s`Kyrie eleison gsunge.
S VATER UNSER-Gebätt mit de Pfarrer und dr Gmeind
Hand in Hand sin alli vereint.

Doxologie :EHRE SEI GOTT IN DER HOEHE
nach dr Kolläkte und em Schlussgebätt
viele Bsucher finden s`isammle vor em Schluss nid nätt.
s Gmeindlied Quand naït la lumière
Ohni Sunne e misère

Dr Säge vo alle 3 Pfarrer gschproche
Bald gits denn z`Mittag ohni z`choche.
Wie immer uf dr Landskron no zum Schluss
s Leimetaler- Lied als Zuckerguss.

Nach em Ässe mit Schinke und Salat
isch au unser Büffee gly parat.
Chueche und Kaffi verchaufe mir als Chor
s`git öppis ind Kasse, das isch wohr,
do göhn mir denn go Ässe in dr Beiz
und sitze zämme, das isch dr Reiz.
Das Gäld dien mir denn **o h n i z`bschisse** zelle
denn d Fraue hänn halt bache welle ! ?
Landskron adee
bi Räge hämmer dy gseh !

Sonja Waldner

Liturgie: Pfr Schwindenhammer ,Paroisse de Leymen
Pfr. Hulin, Röm.Kath. Hofstellen-Flüh
Pfr. Michael Brunner, Evang.-Ref. So-Lei-Ta
Bibellesung: Amos 8, 4-7
Evangelium: Lukas 16,1-1-13
Bläsergruppe: Andreas Oling,Trompete
Martin Weber, Klarinette
Karin Zolnhofer, Posaune
Elias Lüthi, Posaune